

## 每週經課朗誦經文(巴克禮漢羅/教羅)2014/07/06

### 共同經課 - 1 創世記二十四章三十四節~三十八節, 四十二節~四十九節, 五十八節~六十七節

34 我就講, 我是亞伯拉罕 ê 奴僕。35 耶和華大大賜福 tī 我 ê 主人, hō伊興旺, koh hō伊羊、牛、銀、金、奴僕、女婢、駱駝 kap 驢。36 我 ê 主人 ê bó撒拉, 年老 ê 時, kā 我 ê 主人生一個 kiáⁿ; 我 ê 主人亦將一切所有 ê hō chit-ê kiáⁿ。37 我 ê 主人 kah 我 chiū-choā 講, 我 khiā 起迦南人 ê 地, 你 m̄-thang kā 我 ê kiáⁿ 娶 in ê cha-bó-kiáⁿ 做 bó。38 你 tiòh 去我 ê 老父 ê 家, 我本族 hia, kā 我 ê kiáⁿ 娶一個 bó。42 今 á 日我到井邊, 講, 我 ê 主人亞伯拉罕 ê 上帝耶和華 ah, 你若 hō我所行 ê 路順序; 43 我 taⁿ khiā tī 水井邊, 對一個出來 chhiūⁿ 水 ê cha-bó-gín-á 講, 請你將你瓶裡 ê 水淡薄 hō 我 lim; 44 伊若講, 做你 lim, 我亦 beh kā 你 ê 駱駝 chhiūⁿ 水; 願 hit-ê cha-bó-gín-á 做耶和華所定 tiòh hō我 ê 主人 ê kiáⁿ 做 bó-ê。45 我心內 ê 話 iáu 講未了, 利百加就出來, 肩頭頂背水瓶; 落去井邊 chhiūⁿ 水; 我就 kā 伊講, 請你 hō我 lim。46 伊就趕緊 tùi 肩頭頂放落水瓶, 講, 請 lim, 我亦 hō你 ê 駱駝 lim; 我就 lim, 伊亦 hō我 ê 駱駝 lim。47 我 koh 問伊講, 你是 chī-chhiūⁿ ê cha-bó-kiáⁿ? 伊應講, 我是 Bit-ka tui Ná-hók 所生 ê kiáⁿ, Pi-thó-lī, ê cha-bó-kiáⁿ; 我就將環掛 tī 伊 ê 鼻, 手環掛 tī 伊 ê 手。48 我就 à 頭拜耶和華, o-ló 我 ê 主亞伯拉罕 ê 上帝耶和華; 因為伊 chhoā 我行 tú 好 ê 路, hō我得 tiòh 我 ê 主 ê 小弟 ê cha-bó孫來 hō伊 ê kiáⁿ。49 Taⁿ lín 若 beh 用慈愛誠實款待我 ê 主人, 就 kā 我講; 若 m̄, 亦 kā 我講; hō我好 thang òng 左 á 是 òng 右。58 就叫利百加來, 問伊講, 你 beh kap chit 人去 mah? 伊講, 我 beh 去。59 In 就差小妹利百加, kap 伊 ê 奶母, kap 亞伯拉罕 ê 奴僕, 以及 tè 伊 ê 人去。60 In 就 kā 利百加祝福, 對伊講, 阮小妹 ah, 願你做千萬人 ê 老母, 願你 ê 後裔得 tiòh 對敵 ê 關隘。61 利百加 kap 伊 ê 女婢起來騎駱駝, tè hit-ê 人; 奴僕就 chhoā 利百加去。62 以撒 khiā 起 tī 南地, hit 時 tui Pi-jī-láh 海來 ê 路來。63 日 beh 暗, 以撒出來 tī 田裡, 靜靜 teh 想, kiáh 目一下看, 看見駱駝來。64 利百加看見以撒, 就 tui 駱駝落來。65 問 hit-ê 奴僕講, Tī 田裡行來迎接咱 ê 是 chī-chhiūⁿ? 奴僕講, 是我 ê 主人。利百加就 thèh 帕家已罩。66 奴僕將所做一切 ê 事, kā 以撒講。67 以撒就牽利百加入伊 ê 老母撒拉 ê 布棚, 娶伊做 bó; koh 真疼伊。以撒 tui 老母死後, 到 chit-tiáp chiah 得 tiòh 安慰。

### 共同經課 - 2 詩篇四十五篇十節~十七節

10 Cha-bó-gín-á ah, 你 tiòh 聽, tiòh 看, tiòh à 耳孔; M̄-thang 記得你 ê 百姓, kap 你 ê 老父 ê 家; 11 王就 beh 欣慕你 ê súi; 因為伊是你 ê 主, 你 tiòh 拜伊。12 Chhui-ló ê 百姓 beh 來送禮物, 百姓中 ê 好額人 beh 對你求恩。13 王 ê cha-bó-kiáⁿ tī 王宮內, 極其榮華; 伊 ê 衣服是用金線繡 ê。14 伊 beh 穿繡花 ê 衣服, 受 chhoā 到王 ê 面前; 做伴跟隨伊 ê 在室女亦 beh 受 chhoā 到你 ê 面前; 15 In beh 歡喜快樂受引 chhoā; In beh 進入王宮。16 你 ê kiáⁿ 孫 beh 續接你 ê 列祖; 你 beh 設立 in tī 全地做王。17 我 beh hō你 ê 名萬代 hō人記念; 所以萬百姓 beh 永永遠遠感謝你。

### or 詩篇七十二篇

1 所羅門 ê 詩。1) 上帝 ah, 求你將你 ê 判斷賞賜王, 將你 ê 公義賞賜王 ê kiáⁿ。2 伊 beh 照公義審判你 ê 百姓, 照公平判斷你 hiah-ê 困苦 ê 人。3 大山 beh 因為公義, hō百姓平安, 山 á 也 beh án-ni。4 伊 beh kā 百姓中困苦 ê 人判斷, 伊 beh 救 sòng-hiong ê 人, 伊 beh teh 碎暴虐 ê 人。5 人 beh 敬畏你日久月長, 直到萬世代。6 伊 beh 降臨親像雨落 tī 已經割 ê 草, 親像及時 ê 雨潤澤土地。7 Tī 伊 ê 日子義人 beh 興旺; 大大平安 kap 月平久。8 伊 beh 掌權 tui chit-ê 海到 hit-ê 海, Tui 大河到地極。9 Khiā 起 tī 曠野 ê beh 跪拜 tī 伊 ê 面前; 伊 ê 對敵 beh 舐(chī)土粉。10 Tha-si kap 海嶼 ê 列王 beh 進貢; Sī-pa kap Se-pa ê 王 beh 獻禮物。11 列王 lóng beh 仆落拜伊, 萬國 lóng beh 服事伊。12 因為 sòng-hiong 人求叫 ê 時, 伊 beh 救伊; 困苦無依 oá ê 人伊也 beh 救。13 伊 beh 憐憫清淡 sòng-hiong ê 人, 伊 beh 拯救 sòng-hiong 人 ê 性命。14 伊 beh 救贖 in ê 性命脫離壓迫 kap 暴虐; 伊 beh 看 in ê 血做寶貝。15 伊 beh 活 teh; beh 將 Sī-pa ê 金 hō伊, Beh 常常為伊祈禱, thong 日 o-ló 伊。16 Tī 地裡, tī 山頂, 五穀的確茂盛, 所結 ê 五穀 beh 搖動, 親像黎巴嫩 ê 樹; 城內 ê 人 beh 興旺, 親像地上 ê 草。17 伊 ê 名 beh 流到永遠; 伊 ê 名 beh 流傳親像日 ê 久; 人 beh 因為伊來得 tiòh 福氣; 萬國 beh 稱呼伊有福氣。18 耶和華上帝, 就是以色列 ê 上帝, 只有伊行奇異 ê 事, 應該 o-ló 伊。19 願伊榮光 ê 名永遠受 o-ló; 願伊 ê 榮光充滿全地。A-bēng, koh A-bēng。20 耶西 ê kiáⁿ 大衛 ê 祈禱明白。

### 共同經課 - 3 羅馬書七章十五節~二十五 a 節

15 因為我所做 ê 家己 m̄知; 因為我所 teh 行 ê, m̄是我所意愛; 反 tng 我所怨 ê, 我去行伊。16 Taⁿ 我若行所 m̄-ài ê, 我就是承認律法做好。17 Án-ni 行伊 ê, taⁿ m̄是我, 是 tiàm-tī 我心內 ê 罪惡。18 因為我知我內面, 就是我肉體內, 無好 tī-teh; 因為論 hit-ê 意愛, 我就有, 行 hit-ê 好, 我就無。19 因為我所意愛 ê 好, 我無去行; 我所 m̄-ài ê pháiⁿ, 反 tng 去行。20 獨獨我若行我所 m̄-ài ê, hit-ê teh 行 ê, taⁿ m̄是我, 是 tiàm-tī 我內面 ê 罪惡。21 Án-ni 我得知有一個法, 就是當我 ài 行好 ê 時, pháiⁿ kap 我 tī-teh。22 因為我照內心是歡喜上帝 ê 律法。23 但是我看百體中有別個法 kap 我心志 ê 法相交戰, 掠我來降服百體內罪惡 ê 法。24 苦 ah, 我 ê 做人! chī-chhiūⁿ beh 救我脫出 chit-ê 致到死 ê 體 ah? 25 感謝上帝是對咱 ê 主耶穌基督。

### 共同經課 - 4 馬太福音十一章十六節~十九節, 二十五節~三十節

16 Chit 世代我 beh 用甚麼來比並伊? 是親像 gín-ná 坐 tī 街市裡, 來叫 in ê 同伴講, 17 阮 tui lín pùn 笛 á, lín 無跳舞; 阮 bat 悲哀, lín 無搥胸。18 因為約翰來, 無食無 lim; 人就講, 伊患 tiòh 鬼。19 人子來亦食亦 lim; 人就講, 伊是貪食好酒 ê 人, 抽餉 kap pháiⁿ 人 ê 朋友。若是智慧 tui 伊 ê 所行顯明伊是 tiòh。25 當 hit 時耶穌應講, 父 ah, 天地 ê 主, 我 o-ló 你, 因為你將 chiah-ê 事, tui 智慧聰明 ê 有隱密伊, tui 細 kiáⁿ 有顯明伊; 26 父 ah, 是 lah; 因為你看 án-ni 做歡喜。27 萬項有 tui 我 ê 父交付我, 父以外無一個 bat Kiáⁿ; Kiáⁿ kap Kiáⁿ 所 ài beh 指示 ê 以外, 無一個 bat 父。28 Lín 見若 tiòh 磨擔(taⁿ)重擔(tàⁿ)ê, tiòh 就近我; 我 beh hō lín 安歇。29 我心內溫柔謙遜; lín 背我 ê taⁿ, 來 tui 我學, 就 lín ê 心神會得 tiòh 安歇。30 因為我 ê taⁿ 是快, 我 ê 擔是輕。